



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 547/1 Prot.

Tiranë, më 27. 04. 2018

V E N D I M

Nr. 112, Datë 27. 04. 2018

Mbështetur në nenin 32, pika 1, gërma a), të ligjit nr. 10 221, datë 04.02.2010 “Për mbrojtjen nga diskriminimi”, pranë Komisionerit për Mbrojtjen nga Diskriminimi, është paraqitur ankesa Nr. 49, datë 20.04.2018, e H. M., ku pretendohet për diskriminim për shkak të “*bindjeve politike*”¹, nga ana e Drejtorisë së Shëndetit Publik Mat (në vijim DSHP Mat).

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I :

Sipas shpjegimeve të dhëna, në formularin e ankesës, subjekti ankues deklaron se, që nga viti 1988, ushtron profesionin e mjekut të përgjithshëm. Prej 16 vitesh ankuesi është emëruar si mjek pranë Qendrës Shëndetësore Baz, Mat. Nga viti 2007 njëkohësisht ka ushtruar edhe detyrën e Drejtorit të kësaj qendre shëndetësore. Refruar pretendimeve të ankuesit, gjatë periudhës 22.04.2015-30.07.2016, nga ana e Drejtorisë së Shëndetit Publik, pavarësisht kompetencave, janë ndërmarrë një sër veprimesh për largimin nga detyra. Fillimisht më datë 22.04.2015, me anë të shkresës nr. 1847/12 prot., Ministri i Shëndetësisë ka njoftuar largimin e ankuesit nga pozicioni i drejtorit dhe emërimin e tij në pozicionin e mjekut të familjes. Më datë 11.06.2015, me shkresën nr. 2240/81 prot., ankuesi është njoftuar sërish nga Ministria e Shëndetësisë për largimin nga pozicioni i mjekut të familjes në Qendrën Shëndetësore Suç dhe emërimin e tij në pozicionin e Drejtorit në Qendrën Shëndetësore Macukull. Pavarësisht vendimeve të marra nga Ministria e Shëndetësisë për lëvizjet në grup të punonjësve në shkresat e sipërcituar, asnjë nga këto lëvizje nuk është ekzekutuar, pasi i gjithë personeli mjekësor dhe administrativ ka vijuar punën në pozicionet e mëparshme.

Sipas ankuesit, shkak i të gjitha lëvizjeve dhe veprimeve të ndërmarra nga ana e Ministrisë së Shëndetësisë, është bërë ankimi që bashkëshortja e tij ka depozituar pranë Komisionerit për

¹ Anëtarë i Partisë Demokratike të Shqipërisë më datë 20.11.1992, vërtetuar me Kartelën e Anëtarësisë Nr. 003647

Mbrojtjen nga Diskriminimi kundër Drejtorit të Shëndetit Publik Mat. Pas vendimit të marrë nga Komisioneri për Mbrojtjen nga Diskriminimi, për konstatimin e diskriminimit për shkak të bindjeve politike të bashkëshortes, ndaj ankuesit janë ndërmarrë të gjitha veprimet e sipërcituara. Aktualisht ankuesi vijon të ushtrijë detyrën e mjekut të familjes dhe Drejtorit të Qendrës Shëndetësore Suç.

Në përfundim të ankesës, H. M. kërkon nga Komisioneri për Mbrojtjen nga Diskriminimi, të konstatojë trajtimin e pabarabartë dhe diskriminues të tij, nga ana e Ministrisë së Shëndetësisë dhe Mbrojtjes Sociale dhe Drejtorisë së Shëndetit Publik Mat.

Në nenin 1 të Ligjit nr. 10221, datë 04.02.2010 “Për Mbrojtjen nga Diskriminimi”, përcaktohet se: *“Ky ligj rregullon zbatimin dhe respektimin e parimit të barazisë në lidhje me gjininë, racën, ngjyrën, etninë, gjuhën, identitetin gjinor, orientimin seksual, bindjet politike, fetare ose filozofike, gjendjen ekonomike, arsimore ose shoqërore, shtatzaninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicione gjenetike, aftësinë e kufizuar, përkatësinë në një grup të veçantë, ose me çdo shkak tjetër”*.

Në bazë të nenit 7, të Ligjit 10221, datë 04.02.2010 “Për Mbrojtjen nga Diskriminimi”, mbrojtja nga diskriminimi, garantohet nga çdo veprim ose mosveprim i autoriteteve publike ose i personave fizikë a juridikë që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë.

Bazuar në ankesën nr. 49, datë 23.04.2018, si dhe dokumentacionit dërguar në mbështetje të pretendimeve të tij, Komisioneri vlerëson se, H. M. është vënë në dijeni për sjelljet diskriminuese të pretenduara nga ana e Ministria e Shëndetësisë dhe Drejtoria e Shëndetit Publik Mat, nëpërmjet shkresave, në periudhën 22.04.2015-30.07.2016. Për këtë fakt, siç ka parashtruar edhe në ankesë, H. M. është vënë në dijeni përpara datës 30.07.2016, për trajtimin e disfavorshëm. Pra, momenti në të cilin ankuesi është vënë në dijeni për diskriminimin e pretenduar përkon me datën 30.07.2016. Në këto kushte, mbështetur në informacionin e vënë në dispozicion nga ankuesi, konstatohet se ai ka më shumë se një vit që ka marrë dijeni mbi situatën diskriminuese të pretenduar.

Për sa më sipër, referuar nenit 33 pika 4/dh të ligjit nr. 10221/2010 “Për Mbrojtjen nga Diskriminimi” i cili citon se *“Ankesa nuk pranohet nëse paraqitet më vonë se tre vjet nga ndodhja e diskriminimit ose më vonë se një vit nga marrja dijeni nga i dëmtuari, për këtë fakt”*, ankesa nuk mund të pranohet dhe për rrjedhojë nuk mund t’i nënshtrohet procedurave të mëtejshme të parashikuara në ligj për shqyrtimin e saj.

Bazuar në ligjin nr. 10221/2010 “Për Mbrojtjen nga Diskriminimi” neni 34, pika 1, subjekti ankues pavarësisht mos pranimit të ankesës, ka të drejtën e ngritjes së padisë në gjykatë pa e lidhur atë me mospranimin e saj nga Komisioneri për shkak të procedurës ligjore.

Më konkretisht, sipas nenit 34, pika 1 dhe 2, të ligjit nr. 10221/2010 “Për Mbrojtjen nga Diskriminimi”, Subjektet që kanë të drejtë të paraqesin padi për diskriminim, 1: “Çdo person ose grup personash që pretendojnë se ndaj tyre është ushtruar diskriminim për një nga shkaqet e përmendura në nenin 1 të këtij ligji, mund të paraqesin kërkesëpadi përpara gjykatës kompetente sipas përcaktimeve të Kodit të Procedurës Civile për dëmshpërblim sipas ligjit ose, sipas rastit, të kryejnë kallëzimin përpara organeve kompetente për ndjekje penale”, 2: “Paraqitja e ankimit përpara komisionerit nuk është kusht për të paraqitur një kërkesëpadi dhe nuk përbën pengesë për personin e dëmtuar t’i drejtohet gjykatës ose organeve të ndjekjes penale”.

Për sa më sipër, Komisioneri për Mbrojtjen nga Diskriminimi ju rekomandon që bazuar në ligjin Nr.10221/2010 “Për Mbrojtjen nga Diskriminimi” neni 36, pika 1, *Procedura para gjykatës “Padia i paraqitet gjykatës kompetente nga një prej subjekteve të parashikuara në nenin 34 të këtij ligji jo më vonë se 5 vjet nga dita që ka ndodhur sjellja e pretenduar diskriminuese dhe jo më vonë se 3 vjet nga dita që i dëmtuari merr dijeneri për këtë sjellje”,* ti drejtoheni gjykatës kompetente për shqyrtimin e kësaj ankese.

PËR KËTO ARSYE:

Nga shqyrtimi i kësaj ankese dhe bazuar në nenin 33, pika 4/dh e Ligjit nr. 10 221, datë 04.02.2010 “Për mbrojtjen nga diskriminimi”, Komisioneri për Mbrojtjen nga Diskriminimi,

V E N D O S I :

1. Mospranimin e ankesës së H. M., për shkak se është e papajtueshme me dispozitat e ligjit 10221/2010 “Për Mbrojtjen nga Diskriminimi”.
2. Rekomandimin e subjektit ankues që pretendimin për diskriminim, ta ndjekë gjyqësisht, në zbatim të nenit 36, pika 1 të ligjit “Për Mbrojtjen nga Diskriminimi”.
3. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijeneri.

KOMISIONERI

Robert GAJDA

(Shkaku: Bindjet politike)

(Fusha: Punësim)